

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN
DARIPADA : TUAN KHALID BIN ABD SAMAD
[SHAH ALAM – AMANAH]
NO. SOALAN : 500

Tuan Khalid Bin Abd Samad [Shah Alam] minta **PERDANA MENTERI** menyatakan jumlah pelarian terkini mengikut kewarganegaraan, jenis pelarian (Suaka Politik, Perang) dan adakah terdapat perbezaan layanan yang diberikan Kerajaan terhadap Rohingya dan Syria, jika benar, nyatakan sebab-sebab perbezaan layanan tersebut.

JAWAPAN: YB. DATO' SERI DR. SHAHIDAN BIN KASSIM
MENTERI DI JABATAN PERDANA MENTERI

Tuan Yang Di-Pertua,

Berdasarkan kepada rekod di pejabat Suruhanjaya Tinggi Pertubuhan Bangsa-Bangsa Bersatu Mengenai Pelarian (UNHCR) di Kuala Lumpur, **sehingga 30 September 2017**, terdapat seramai **150,379 orang** "pelarian" dan pemohon suaka yang telah didaftarkan di Malaysia.

Daripada jumlah ini, seramai 51,788 orang adalah pemohon suaka dan seramai 98,591 orang merupakan pelarian.

Mereka ini berasal dari 56 buah negara dengan jumlah terbesar adalah dari 10 negara berikut:

1. Myanmar - 132,719 orang (62,153 orang adalah etnik Rohingya)
2. Pakistan - 4,478 orang
3. Yemen - 2,279 orang
4. Syria - 2,194 orang
5. Sri Lanka - 2,157 orang
6. Somalia - 2,141 orang
7. Iraq - 1,469 orang
8. Afghanistan - 1,084 orang

9. Palestin - 733 orang
10. Iran - 412 orang

Secara dasarnya, Kerajaan tidak mengiktiraf status "Pelarian" memandangkan Malaysia bukan Negara Pihak kepada Konvesyen Status Pelarian 1951 atau Protokol Status Pelarian 1967. Walau bagaimanapun, atas dasar kemanusiaan, Kerajaan Malaysia membenarkan Pendatang Asing Tanpa Izin yang memegang kad UNHCR untuk tinggal sementara waktu di negara ini. Dasar negara mengenai perkara ini adalah menggunakan asas "satu kes ke satu kes" (case-by-case basis).

Seperti mana Tuan Yang Di-Pertua sedia maklum, YAB Perdana Menteri semasa sesi ke-70 Perhimpunan Agung Pertubuhan Bangsa-Bangsa Bersatu (PBB) telah menyatakan komitmen Malaysia untuk menerima 3,000 orang migran warganegara Syria dalam tempoh tiga (3) tahun secara sukarela atas dasar ihsan dan perikemanusiaan. Komitmen ini merupakan satu inisiatif Kerajaan Malaysia dalam menjalankan tanggungjawabnya bersama-sama komuniti antarabangsa untuk menghulurkan bantuan kepada rakyat Syria yang berdepan dengan konflik dan peperangan.

Dalam hal ini, satu program khas telah diwujudkan dan dikenali sebagai Program Penempatan Sementara Migran Syria (PPSMS). Di bawah Program ini, rakyat Syria yang menjadi mangsa konflik peperangan telah diberikan peluang untuk menjalani kehidupan baru di Malaysia.

Memandangkan Malaysia tidak mengiktiraf status pelarian maka kumpulan ini dikenali sebagai migran. Ini adalah bagi memudahkan mereka untuk menjalani aktiviti harian seperti bekerja, belajar dan mendapat akses perubatan seperti biasa.

Dalam menjayakan usaha ini, Kerajaan telah menjalinkan kerjasama dengan sektor swasta dan organisasi bukan kerajaan (NGO) bagi memastikan usaha-usaha yang dirancang di peringkat agensi/jabatan Kerajaan yang terlibat dapat dilaksanakan secara bersepadu dan komprehensif.

Program ini hanyalah berdasarkan kepada pemberian kemudahan Penempatan Sementara bagi membantu migran Syria ini untuk hidup dan meneruskan kehidupan mereka sepanjang keberadaan mereka di Malaysia. Migran Syria ini akan pulang ke negara mereka apabila keadaan kembali pulih dan perang saudara di Syria selesai.

Untuk makluman Tuan Yang Di-Pertua, inisiatif kemanusiaan yang dihulurkan oleh Kerajaan kepada golongan migran dan pelarian adalah tanpa diskriminasi terhadap etnik, agama dan politik. Berdasarkan dasar semasa Kerajaan Malaysia seperti yang disebutkan, pemegang kad UNHCR adalah tidak dibenarkan untuk bekerja memandangkan golongan ini masih merupakan Pendatang Asing Tanpa Izin dan mereka tidak mempunyai sebarang dokumen perjalanan atau pasport.

Namun demikian, dengan mengambil kira situasi pemegang kad UNHCR etnik Rohingya yang mana status mereka yang tidak diiktiraf sebagai warganegara oleh Kerajaan Myanmar dan telah lama menetap di Malaysia, Mesyuarat Jemaah Menteri pada 2 Mac 2016 telah bersetuju dengan Penubuhan Jawatankuasa Kerja Projek

Perintis Kebenaran Bekerja Untuk Pemegang Kad UNHCR Etnik Rohingya.

Projek Perintis ini dilihat memberi ruang kepada golongan tersebut untuk menyara kehidupan melalui pekerjaan yang sah dan sekali gus dapat mengekang mereka daripada terlibat dengan aktiviti jenayah dan sosial. Selain itu, Projek Perintis ini juga akan lebih memudahkan pihak Kerajaan memantau keberadaan mereka di dalam negara, meningkatkan kemahiran teknikal mereka serta memberi laluan kepada bentuk kerjasama antara Kerajaan dan UNHCR untuk lebih mempercepatkan proses penempatan ke negara ketiga.

Peserta Projek Perintis ini adalah tertakluk kepada perundangan dan syarat-syarat penggajian pekerja asing sedia ada termasuk obligasi majikan di bawah Akta Standard-Standard Minimum Perumahan dan Kemudahan Pekerja 1990 dan Peraturan-Peraturan Imigresen 1963. Dalam hubungan ini, sepertimana obligasi majikan terhadap pekerja asing yang sah di dalam negara, dasar yang sama juga turut digunakan bagi menjamin hal ehwal peserta Projek Perintis ini.

Kerajaan pada masa ini sedang melaksanakan gerak kerja Projek Perintis tersebut yang mensasarkan 300 orang kumpulan kecil etnik Rohingya yang bekerja di bawah sektor perladangan dan perkilangan sahaja.

Sekian, terima kasih.